

بِسْمِ اللَّهِ الرَّحْمَنِ الرَّحِيمِ
نَحْمَدُهُ وَنُصَلِّي عَلَى رَسُولِهِ الْكَرِيمِ

সংক্ষিপ্তসার খুতবা জুমআ

হযরত মসীহ্ মাওউদ (আ.) এর তত্ত্বজ্ঞানপূর্ণ নির্দেশনাবলীর আলোকে
কুরআন করীমের কল্যানরাজি, অতুলনীয় মর্যাদা ও মাহাত্ম্যের বর্ণনা

সৈয়্যদনা হযরত আমীরুল মুমিনীন হযরত মির্যা মাসরুর আহমদ খলিফাতুল মসীহ্ আল্
খামেস আইয়াদাহুল্লাহ্ তাআলা বেনাসরিহিল আযিয কর্তৃক ২২ মার্চ, ২০২৪ ইং তারিখে
যুক্তরাজ্যের (টিলফোর্ড) ইসলামাবাদের মসজিদে মুবারকে প্রদত্ত খুতবা জুমআর সংক্ষিপ্তসার

আশ্হাদু আল্লাহ্ ইলাহা ইল্লাল্লাহু ওয়াহ্দাহু লাশারীকালাহু, ওয়াশ্হাদু আনু মুহাম্মাদান আবদুহু ওয়ারসূলুহু।
আম্মাবাদু ফা-আউযুবিল্লাহি মিনাশ শয়তানির রজিম, বিসমিল্লাহির রহমানির রহিম। আল্হামদু লিল্লাহি
রব্বিল ‘আলামিন। আর রহমানির রহিম। মালিকি ইয়াওমিদ্দিন। ইয়্যাকা না’বুদু ওয়া ইয়্যাকা নাস্তাজ্’ন।
ইহদিনাস সিরাত্বাল মুসতাক্বীম। সিরাত্বাল লায়ীনা আনআ’মতা আ’লাইহিম। গায়রিল মাগদূবি ‘আলায়হিম।
ওয়ালাদ্দল্লীন।

شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَىٰ وَالْفُرْقَانِ فَمَن شَهِدَ مِنْكُمُ
الشَّهْرَ فَلْيَصُمْهُ وَمَن كَانَ مَرِيضًا أَوْ عَلَىٰ سَفَرٍ فَعِدَّةٌ مِّنْ أَيَّامٍ أُخَرَ يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ
الْعُسْرَ وَلِتُكْمِلُوا الْعِدَّةَ وَلِتُكَبِّرُوا اللَّهَ عَلَىٰ مَا هَدَاكُمْ وَلَعَلَّكُمْ تَشْكُرُونَ۔

তাশাহুদ, তা’উয ও সূরা ফাতিহা পাঠের পর সূরা বাকারার ১৮৬ নং আয়াত তেলাওয়াত ও অনুবাদ
উপস্থাপন করে সৈয়্যদনা হুযুর আনোয়ার (আই.) বলেন :

এই আয়াতে আল্লাহ্ তা’লা মানবজাতির জন্য এক মহান হেদায়াতস্বরূপ অবতীর্ণ এই কিতাবে সকল
বিষয় পরিবেষ্টন করে, সাকুল্য পথনির্দেশনা প্রদান করে, মানুষকে আল্লাহ্ তা’লার পানে অগ্রসর হওয়ার
সকল পথ বাতলে দিয়ে, শয়তানের সকল (প্রলোভনের) ফাঁদ সম্পর্কে সতর্ক করে, বর্তমান ও ভবিষ্যতে
আগত বিষয়াদি সম্পর্কে নির্দেশনা প্রদান করে আর সেসবের আশঙ্কা সম্পর্কে অবগত করে তা থেকে মুক্তির
উপায় সম্পর্কে অবহিত করে, খোদা তা’লার সাথে সম্পর্ক সুদৃঢ় করার এবং হেদায়াতের ওপর প্রতিষ্ঠিত
থাকার সকল পন্থা শিখিয়ে, এই সর্বশেষ কামেল ও পরিপূর্ণ শরীয়তের বর্ণনা করে রমযান মাসের গুরুত্ব
বর্ণনা করেছেন।

কাজেই, সৌভাগ্যবান সে যে এই মহান কিতাবকে নিজের কর্মপন্থা নির্ধারণ করে এর ওপর আমল

করে এবং নিজের ইহ ও পরকালকে সুসজ্জিত করে। সত্যবাদিতা অবলম্বন করুন এবং সত্যের ওপর প্রতিষ্ঠিত হোন, তবেই স্বীয় বান্দার প্রতি আল্লাহ তা'লার ভালোবাসাপূর্ণ ব্যবহারের দৃশ্যও অবলোকন করবেন। সুতরাং এই হল রমযান মাসের গুরুত্ব। আল্লাহ তাআলা এই মাসেই এই পরিপূর্ণ শরিয়ত আমাদের উপর অবতীর্ণ করেছেন আর এর মধ্যে রোযার গুরুত্ব ও তাৎপর্য এবং ইবাদতের পদ্ধতি আমাদের শেখানো হয়েছে। সুতরাং যতক্ষণ না আমরা এই পরিপূর্ণ হেদায়াত সম্পর্কে সঠিক জ্ঞান অর্জন না করি এবং একে আমাদের জীবনের অংশ করে না তুলি, ততক্ষণ পর্যন্ত আমরা রোযার প্রকৃত তাৎপর্য অনুধাবন করতে পারব না। আমরা আহমদীরা সৌভাগ্যবান যে আল্লাহ তাআলা এ যুগে আগত মহানবী (সা.) এর নিষ্ঠাবান সেবক হযরত মসীহ মাওউদ (আ.) এর মাধ্যমে আমাদেরকে সেই তত্ত্বজ্ঞান সম্পর্কে অবহিত করেছেন। হযরত মসীহ মাওউদ (আ.) পবিত্র কুরআনের জ্ঞানার্জন এবং এথেকে কল্যাণরাজি আহরণের পথপ্রদর্শনের উদ্দেশ্যে অসংখ্য বইপুস্তক রচনা করেছেন যেগুলো অধ্যয়নের মাধ্যমে আমরা প্রকৃত অর্থে পবিত্র কুরআন থেকে কল্যাণমণ্ডিত হতে পারি।

মসীহ মাওউদ দিবস, যেদিন আমরা আনুষ্ঠানিকভাবে জলসা'র আয়োজনও করে থাকি এবং আল্লাহ তা'লার প্রতিশ্রুতি ও মহানবী (সা.)-এর ভবিষ্যদ্বাণী অনুযায়ী হযরত মসীহ মাওউদ (আ.)'র আগমন সম্পর্কে আলোচনাও করে থাকি। কিন্তু ঈমানের উন্নতি কেবল এ পর্যন্তই সীমিত নয়, বরং হযরত মসীহ মাওউদ (আ.) আমাদেরকে পবিত্র কুরআনের প্রেক্ষাপটে যে ধনভাণ্ডার দান করেছেন তা অধ্যয়ন এবং এর প্রতি আমল করা আর একে জীবনের অংশ বানিয়ে নেয়াও অত্যন্ত গুরুত্বপূর্ণ- যা ব্যতিরেকে আমাদের ঈমান পরিপূর্ণ হতে পারে না। অতএব, এদিকে আমাদের বিশেষ মনোযোগ দেয়া উচিত। রমযানে নিছক রোযা রাখা, ফরয নামায পড়া এবং কিছু নফল ইবাদত করলেই রমযানের প্রাপ্য হক্ক আদায় হয় না, বরং পবিত্র কুরআন পাঠ এবং এর নির্দেশাবলী অনুসন্ধান করে এসবের ওপর আমল করাও অত্যন্ত গুরুত্বপূর্ণ।

রমযানে বিশেষভাবে নূন্যতম প্রত্যেকের দৈনিক এক পারা কুরআন পাঠ করা উচিত যেন পুরো মাসে কমপক্ষে একবার কুরআন খতম করা যায়। হযরত জিব্রাঈল (আ.) মহানবী (সা.)-এর সাথে প্রতি রমযানে সম্পূর্ণ কুরআন একবার এবং তাঁর জীবনের শেষ রমযানে দু'বার পুনরাবৃত্তি করেছেন। তাই পবিত্র কুরআন পাঠের অপারিসীম গুরুত্বের বিষয়টি প্রত্যেকের দৃষ্টিপটে রাখা উচিত।

হযরত মসীহ মাওউদ (আ.) উপরোল্লিখিত আয়াতের ব্যাখ্যায় বলেন, শাহুরু রামাযানাল্লাযী উনযিলা ফিহিল কুরআন- এই একটি বাক্য দ্বারাই রমযান মাসের মাহাত্ম্য ও তাৎপর্য প্রতিভাত হয়। সূফী-সাধকরা লিখেছেন, এই মাস হৃদয়কে জ্যোতির্মণ্ডিত করার জন্য উত্তম একটি মাস। এ মাসে অজস্র ধারায় কাশ্ফ বা দিব্যদর্শনের অভিজ্ঞতা লাভ হয়ে থাকে। নামায আত্মাকে পবিত্র করে আর সওম তথা রোযা হৃদয়কে জ্যোতির্মণ্ডিত করে। আত্মিক পরিশুদ্ধির অর্থ হলো, প্রবৃত্তির কামনা-বাসনার কবল থেকে মুক্তি লাভ করা। আর হৃদয় জ্যোতির্মণ্ডিত হওয়ার অর্থ হলো, তার প্রতি দিব্যদর্শনের দ্বার উন্মোচিত হওয়া যেন সে খোদা তা'লাকে দেখতে পায়।

তিনি (আ.) পবিত্র কুরআন অধ্যয়ন এবং অনুধাবনের প্রতি মনোযোগ আকর্ষণ করে বলেন, আমি কুরআন শব্দটি নিয়ে প্রাধান্য করেছি। তখন আমার কাছে স্পষ্ট হয়, এই পবিত্র শব্দটিতে একটি শক্তিশালী ভবিষ্যদ্বাণী রয়েছে আর তা হলো, এর নাম কুরআন অর্থাৎ পাঠযোগ্য গ্রন্থ আর এক সময় এটি অনেক বেশি অধ্যয়নের যোগ্য কিতাব বলে বিবেচিত হবে যখন আরও অনেক পুস্তকাদি এর পাশাপাশি পাঠের অংশীদার হবে। সে সময় ইসলামের সম্মান রক্ষার্থে এবং মিথ্যার মূলোৎপাটন করতে এটিই এমন এক গ্রন্থ বলে বিবেচিত হবে যা পাঠের যোগ্য হবে এবং অন্যান্য কিতাবসমূহ একেবারে পরিত্যাজ্য বলে গণ্য হবে। তিনি

(আ.) বলেন, এখন সমস্ত পুস্তকাবলী পরিত্যাগ করো এবং রাতদিন আল্লাহর কিতাব অধ্যয়নে রত হও। বড়ই বেঈমান সেই ব্যক্তি যে পবিত্র কুরআনের প্রতি অভিনিবেশ করে না এবং অন্যান্য গ্রন্থের প্রতি ঝুঁকে থাকে। আমাদের জামা'তের সদস্যদের উচিত পবিত্র কুরআনের প্রতি মনোযোগ ও অভিনিবেশে নিজেদের প্রাণ ও আত্মাকে নিবেদিত করা এবং হাদীস অধ্যয়ন পরিত্যাগ করা। অত্যন্ত পরিতাপের বিষয় হলো, পবিত্র কুরআন ততটা অধ্যয়ন করা হয় না যতটা বিভিন্ন হাদীস অধ্যয়ন করা হয়। এ যুগে পবিত্র কুরআনের অস্ত্র হাতে ধারণ করলে বিজয় অর্জিত হবে। এ জ্যোতির বিপরীতে কোনো অন্ধকার আর টিকতে পারবে না।

হযরত মসীহ মাওউদ (আ.) অন্যত্র বলেন, এটি কত বড় অন্যায়ে যে, ইসলামী নীতিসমূহ এবং কুরআনকে পরিত্যাগ করে এক জগৎপূজারী জাতির অনুসরণ করা হবে অথচ যা এক পশুতুল্য জগতকে মানুষে এবং মানুষকে খোদাপ্রেমী মানুষে পরিণত করেছে। যারা চায় ইসলামের উন্নতি হোক এবং এর মাঝে প্রাণের সঞ্চারণ হোক; অথচ পাশ্চাত্যকে নিজেদের কিবলা বানাতে চায় আর মনে করে যে, প্রাচ্য অনেক উন্নতি করেছে তাই তাদেরকে নিজেদের পথপ্রদর্শক বানাতে চায়- তারা কখনোই সফল হতে পারবে না। তারাই সফলতা লাভ করবে যারা পবিত্র কুরআনের অনুসরণে জীবনযাপন করে। আর এটি ইহজগতেরও সফলতা, ধর্মজগতেরও সফলতা এবং পরকালেরও সফলতা। জগৎপূজারীরা কেবলমাত্র ইহলৌকিক সফলতায় সন্তুষ্ট থাকে, কিন্তু সব ধরনের সফলতা যদি পেতে চাও তাহলে তা কেবল পবিত্র কুরআনের মাধ্যমেই পাওয়া সম্ভব।

তিনি (আ.) বলেন, কুরআনকে পরিত্যাগ করে সফলতা এক অসম্ভব ও অচিন্তনীয় বিষয় আর এরূপ সফলতা এক মরীচিকাস্বরূপ যার অনুসন্ধানে এই লোকেরা নিমগ্ন হয়ে আছে।

পবিত্র কুরআনের প্রতি মুসলমানদের উদাসীনতা এবং এটি পাঠে অলসতার উল্লেখ করে অত্যন্ত দুঃখ-ভারাক্রান্ত হৃদয়ে তিনি (আ.) বলেছেন, “আল্লাহ তা'লা মহানবী (সা.)-কে প্রেরণ করেছেন যিনি এসে জগতের সামনে সেই খোদাকে উপস্থাপন করেছেন যা মানবীয় প্রকৃতি ও প্রবৃত্তি আকাজক্ষা করে আর এর পরিপূর্ণ বর্ণনা খোদা তা'লার ঐশী গ্রন্থ পবিত্র কুরআনে বিদ্যমান রয়েছে। তিনি (আ.) বলেন, আমি এ পর্যায়ে অমুসলমানদেরকে বাদ দিয়ে কেবলমাত্র তাদের সম্পর্কে বলব যারা মুসলমান আর তাদেরকে উদ্দেশ্য করেই বলব, হে আমার প্রভু! আমার জাতি কুরআনকে পরিত্যাজ্য ঘোষণা করেছে।”

তিনি (আ.) বলেন “স্মরণ রেখো! পবিত্র কুরআনই সত্যিকার কল্যাণ ও প্রকৃত মুক্তির উৎস। এটি সেসব লোকের দুর্বলতা যারা পবিত্র কুরআনের ওপর আমল করে না। যারা আমল করে না তাদের মধ্যে একদল তো এর ওপর বিশ্বাসই রাখে না এবং এটিকে আল্লাহ তা'লার বাণী বলেই মনে করে না। এরা তো অনেক দূরে অবস্থান করেছে। কিন্তু যারা এই বিশ্বাস রাখে যে, এটি আল্লাহ তা'লার বাণী এবং এটিই পরিত্রাণের মাধ্যম, তারা যদি এই গ্রন্থের ওপর আমল না করে তাহলে এটি কত বড় আশ্চর্য ও পরিতাপের বিষয়! এদের মধ্যে অনেকেই এটিকে তাদের সমগ্র জীবনে কখনো পড়েও নি। অতএব, এমন মানুষ যারা খোদা তা'লার বাণী সম্বন্ধে এরূপ উদাসীন ও নির্বিকার তাদের দৃষ্টান্ত সেই ব্যক্তির ন্যায় যার এটি জানা আছে যে, অমুক ঝর্ণার পানি অত্যন্ত স্বচ্ছ, সুমিষ্ট ও শীতল এবং সেই পানি অনেক ব্যাধির আরোগ্যের কারণ; এই সুনিশ্চিত জ্ঞান থাকা সত্ত্বেও এবং পিপাসার্ত ও অনেক রোগে আক্রান্ত থাকার পরেও সে সেই প্রশ্রবণের নিকট যায় না।”

হুযূর (আই.) বলেন, আল্লাহ তা'লা আমাদেরকে প্রকৃত অর্থে কুরআনের অর্থ অনুধাবন এবং এর প্রতি আমল করার তৌফিক দিন। শুধুমাত্র রমযানেই নয়, বরং আমরা যেন সর্বদা কুরআনের শিক্ষানুযায়ী জীবনযাপনকারী হই। আল্লাহ তা'লা আমাদেরকে এ রমযানে এবং পরবর্তীতেও সর্বাবস্থায় পবিত্র কুরআনের

শিক্ষা থেকে কল্যাণমণ্ডিত হওয়ার তৌফিক দান করুন।

নিজেদের দোয়ায় ফিলিস্তিনিদের স্মরণ রাখুন। অনুরূপভাবে সুদানের সাধারণ জনগণের জন্যও দোয়া করুন। ফিলিস্তিনে এবং সুদানে মানুষ ক্ষুধার্ত মারা যাচ্ছে। একইভাবে অন্যান্য মুসলমান দেশগুলোর পরিস্থিতিও অবর্ণনীয়। রাষ্ট্রপ্রধানরা নিজের দেশের সাধারণ মানুষের ওপর অত্যাচার করছে, মানুষ গৃহযুদ্ধে লিপ্ত হচ্ছে।

আল্লাহ তা'লা তাদের প্রতিও কৃপা করুন। ইয়েমেন ও পাকিস্তানের আহমদী কারাবন্দীদের দ্রুত মুক্তির জন্য দোয়া করুন এবং পাকিস্তানের সার্বিক পরিস্থিতি উন্নতি হওয়ার জন্যও দোয়া করুন।


পরিশেষে হুযূর (আই.) কয়েকজন প্রয়াত ব্যক্তির স্মৃতিচারণ করেন এবং নামাযের পর তাদের গায়েবানা জানাযা পড়ানোর ঘোষণা প্রদান করেন। যারা হলেন, আমেরিকার মুকাররম ডা. উযীর উদ্দীন মনসুর আহমদ সাহেব, কানাডার মুকাররম হাসান আবেদীন আগা সাহেব, সৌদি আরবের মুকাররম উসমান হুসাইন মুহাম্মদ খায়ের সাহেব, আলজেরিয়ার মুকাররম মুহাম্মদ যাহরাবী সাহেব, রাবওয়ার মুকাররম সাঈদ আহমদ ওঢ়ায়েচ সাহেব এবং হল্যান্ডের মুকাররম শাহ্বাজ গোল্ডল সাহেব। হুযূর (আই.) প্রয়াতদের আত্মার শান্তি ও মাগফিরাতের জন্য দোয়া করেন।

আল্‌হামদুলিল্লাহি নাহ্মাদুহু ওয়া নাসতায়ীনুহু ওয়া নাসতাগ্‌ফিরুহু ওয়া নু'মিনুবিহী ওয়া নাতাওয়াক্কালু
আলাইহি ওয়া না'উযুবিল্লাহি মিন শুরুরি আনফুসিনা ওয়া মিন সায়িয়াতি আ'মালিনা-মাইয়্যাহ্‌দিহিল্লাহু
ফালা মুযিল্লাহু ওয়া মাই ইউয্লিলহু ফালা হাদিয়ালাহু-ওয়া নাশহাদু আল্লা ইলাহা ইল্লাল্লাহু ওয়াহ্দাহু লা
শারীকালাহু ওয়ানাশহাদু আন্না মুহাম্মাদান আবদুহু ওয়া রাসূলুহু-

‘ইবাদাল্লাহি রাহিমাকুমুল্লাহু-ইন্নালাহা ইয়া’মুরু বিল ‘আদলি ওয়াল ইহসানি ওয়া ঈ‘তাইযিল কুরবা ওয়া
ইয়ানহা ‘আনিল ফাহশাই ওয়াল মুনকারি ওয়াল বাগ্‌ই-ইয়াইযুকুম লা’আল্লাকুম তাযাক্করুন। উযকুরুল্লাহা
ইয়াযকুরকুম ওয়াদ’উহু ইয়াসতাজিবলাকুম ওয়ালা যিক্‌রুল্লাহি আকবর।

(‘মজলিশ আনসারুল্লাহ ভারত’ কর্তৃক প্রকাশিত সংক্ষিপ্ত উর্দু খুতবার অনুবাদ)

বি. দ্র. - নাযারত নশর ও এশায়াত কাদিয়ান থেকে নব প্রকাশিত বাংলা পুস্তকগুলি হল : ১. ইসলামী শিক্ষার আলোকে প্রকৃত শান্তি
এবং ২. মেয়ারুল মাযাহেব (ধর্মের মানদণ্ড)। পুস্তকগুলি প্রথমবার বাংলা ভাষায় অনূদিত হয়েছে। সংগ্রহের জন্য সংশ্লিষ্ট জেলা
ইনচার্জদের সাথে যোগাযোগ করুন।- ধন্যবাদ

Bengali Khulasa Khutba Juma Huzoor Anwar ^(at) 22 March 2024 Distributed by Ahmadiyya Muslim MissionP.O..... Distt.....Pin.....W.B	To, ----- ----- ----- ----- -----	
বিশদে জানতে : Toll Free No.1800 103 2131 www.alislam.org www.mta.tv www.ahmadiyyamuslimjamaat.in		

Summary of Friday Sermon, 22 March 2024, Bengali 4/4; Translated by Bangla Desk Qadian